

TXITO

Paoro Iokanatsopatakiti Txitomoni

1 ¹Nota Paoro. Teoso nitiri amotakori nitxaua. Xesosi Kristo iokanatakiti nitxaua. Iua iokanatano kăkitimoni Teoso mereėkini auiaċkiti săkiretxiti nisăpiretini ĩkapani. Iokanatano kăkitimoni atăo inakari imarotinina ĩkapani. Atăo inakari imarotiko oerekaua Teoso nireėkiti akamini ĩkapani. ²Aăuikari aăuapiniika anini Teosokata, kotxi kitxakapirĳka itixi kamiko apisa Teoso kamaenetari ikara. Ininiă apokapitikako, kotxi atăonoka iua săkire. !posotari atăo minakati isăpiretini. ³Iketotiniri manapi oerekari isăkire. Isăkire săpiretakani săpiretari isăkire. Ininiă Teoso săkire notamoni isikakiti nisăpiretai, kotxi Teoso amaerekani makatxakakari paniătano nota nisăpiretiniri isăkire.

⁴Niokanatsopata pite Txitomoni. Namarite atăo inakari atoko pitxaua, kotxi pite auikari Xesosi săkire nota auikiniri atokotxikana. Aĳri Teoso, aăuĳte Xesosi Kristo amaerekani makatxakakari pakini, sikari ikinipoko erekari pitemoni. Ninoa iamoniĳkai. Ikamaerekaxiniretaina.

Kôtăkikarerini

⁵Nitakanapai pite Kreta pokomiriĳti, kotxi aparĳka iuaătaă kona xipokapanika, ininiă ninirekari pite kaminiri ikara parĳkatxi. Pimereėna kôtăkikarerini ikini sitatxitiă Teoso săkire auiaċkani ôtăkikakani tĳkane. Pimereėna mitxi nisăpiretakiti iaôka. ⁶Ia atoko inakari kăkiti pimereė kôtăkikarerini ĩkapani: Iua kamari erekari, ininiă maerekati auakasaaki, kona iua xikani maerekati apoka. Ătonokara ĳtanoro aua. Imiakori auikari Xesosi săkire. Ninoa !neenamauata. Ikamarina iri paniătakiti iaôka.

⁷Teoso sikari iparĩka kõtākikarerimoni ikamini ĩkapani, ininiã kõtākikareri kamari erekarinoka. Maerekati auakasaaki, kona iua xikani maerekati apoka. !Iuikaua. !Katimari omanãkarauatini. !Ipoãta. Kona kaneenamari. !Itiretaro txineiro. ⁸Kõtākikareri atão inakari potxitari apakapiniri kãkiti iua aapoko ãki. Ipotxitari kãkiti erekari kamakani. !Katima omanãkarauatini. Erekarinoka ikama. !Ikamari maerekati. Erekarim arotakiti !itakanapari ikamini. ⁹Kõtākikareri atão inakari oerekaãkapeka Teoso sãkire. Imarotari Teoso kaminiri isãkire iaõka, ininiã iteene inĩkatari Teoso sãkire. !Imamakari Teoso sãkire. Ininiãkara imarotari õtãkikiniri apanakini. Iteene imarotari Teoso sãkire, ininiã imarotari oerekiniri apanakini Teoso sãkire manirekakani, Teoso sãkire auikinina ĩkapani.

Erepaniko, Atão Minakati Oerekakani

¹⁰Kaiãopokori kãkiti kona nirekari Teoso nireẽkiti ikaminina. Maxikatiĩka isãkirauatapika. Kamisirienenerini ninoa. Ikara atoko inakani nirekari Teoso takaõtxikare Xoteo minakaniua ĩtoã auini. ¹¹Matxĩkitakari ninoa iotokakiniri atão minakati isãpiretinina, kotxi kãkiti aapoko ãki auakani naiatakakaua ninoa oerekakiti sãkiretxiti xika. !Apakata ninoa oerekakiti sãkiretxiti. Iuaritika ninoa oerekari atão minakati, txineiro apakapinina ĩkapani. ¹²Ninoa atokirini kitxakapirĩka, koerekareri, uai Kreta pokomiriĩti auakarini, txari: “Kreta auakani ãtipirika misirienetari kãkiti. Maerekati kamakani itxauana. Kaneenamari ĩtopa auakari atoko ikamana. Iarinouatana. Paixonina,” itxa iua.

¹³Isãpiretakiti atãopitikara. Ininiã pitaparaxinireritika pipinitana ninoa imasãpiretakanirina ikara atão minakati, Xesosi sãkire atão auikinina ĩkapani. ¹⁴Ininiã pisãpiretana: “!Himaãkatapiriko Xoteoakori kiomaneakorini sãkire atão minakati. !Himaãkatapena atão inakari manirekaãkani paniãtakiti.” ¹⁵Kãkiti Teoso kamaerekatakiti, ikamakiti erekari. Ikinipoko ikamakiti erekari, kotxi Teoso makatxakapekari imaerekani. Kãkiti imaerekani auapanika inakari, Teoso sãkire iaõka makamakati, ikinipoko ikamakiti aua imaerekani. Imaerekani txikotari ixinikakiti. Imaerekani txikotari iua ãkixinire, ininiã ãkixinire !õtãkikari iua maerekati imakamakani ĩkapani. ¹⁶Ninoa txa: “Ate imarotari Teoso,” txamari ikamarina Teoso manirekakiniti, ininiã !imarotarina Teoso. !Inirekarina Teoso. Arakakani atoko itxana, maerekati ikamakitina xika. !Ikamarina Teoso nireẽkiti, ininiã !iposotarina erekari ikaminina.

Txito Õtākikiko

2 ¹Ininiã poerekariko ikinika atão inakari Teoso oerekiko sãkiretxiti.

Kiki Aneẽkani Õtākikiko

²Ia atoko põtākikana kiki aneẽkani: “Hĩxinikariko hĩkamakiti tĩkane hĩkaminiri apisapanika. Erekarĩ hĩkamako apanakini paxitiniĩ ĩkapani. Kona hĩkamapiri hiĩto nireẽkiti. Iteene himarotariko hãuiãkiti. Iteene hĩtiraõkiuatako. Katima omanãkarauataka !hĩtxape.” Ikara atoko põtākikana kiki aneẽkani.

Sito Aneẽkani Õtākikiko

³Ia atoko põtākikana sito aneẽkani: “Hĩkamariko Teoso pĩkakani kamakiti atoko. Maxikatiĩka !hãpoĩtapiri ãti. Kona iteene hiãtapiri iãriã kapoãro. Erekarinoka hõerekako.” Ikara atoko põtākikana ninoa. ⁴Apaka põtākikana sito aneẽkani õtākikinina ãtokoroakoro ia atoko: “Hĩtiretanako hĩtaniri, hamariteakori pakini. ⁵Kona hĩkĩpitapiri hiĩto paniãtakiti. Erekarinanira hĩkamako. Hĩkamariko hĩparĩka haãpoko ãki. Erekarĩ hĩkamako apanakini ĩkapani. Hĩtaniri nireẽkiti hĩkamako, ininiã iuasaaki Teoso sãkire mauĩãkani !imisãkirepiretari Teoso sãkire.” Ikara atoko sito aneẽkani oerekanako ãtokoroakoro.

Ãtokoriakori Õtākikiko

⁶Ininiã iua atokokana põtākikana ãtokoriakori ia atoko: “!Apakata hĩkaminiri hiĩto nireẽkiti.”

Txito Õtākikiko

⁷Txito, ikini pikamakiti pikamako kãkiti erekarĩ kamiko imarotini ĩkapani. Poerekarauatakasaaki, poerekari kãkiti pitiretiniri atão inakari sãkiretxitinoka. Poerekanako Teoso sãkirenoka apiari inini. Poerekarauatakasaaki, poerekariko kãkiti pimakoketakaniri atão minakati pisãkirekata. ⁸Poerekariko atão inakarinoka, ininiã !auari papoĩtiko, kotxi !pikerokari pisãkire. Ikara atoko ininiã, pimokaiakarini pẽtauata, kotxi !ĩposotarina imisãkirepiretinii.

Nitiritxi Amotakoni Õtākikiko

⁹Ia atoko poerekanako nitiritxi amotakoni: “Hĩkĩpitariko hĩpatrãote sãkire. Hĩkamariko hĩpatrãote apokaerekatakitinoka.

Kapakapaenere lhĩtxape. ¹⁰!Hiitirĩkapiri hĩpatrãote tii. Hõerekariko hĩpatrãote pisãkire atão inini. Ininiã hĩpatrãote nirekari imarotininirina Teoso oerekiko, amaerekani makatxakakari oerekiko.”

Ikinipoko Erekari Teoso Sikakiti

¹¹Ikinimanemoni Teoso oerekapekari erekari isikakiti kãkiti maerekani imaktxakini. ¹²Teoso sikakiti erekari oereka atakanapiniri Teoso manirekakiniti. Teoso sikakiti erekari oereka amanirekakaniri ĩkorapokoriti auakani ĩto nireẽkiti. Teoso sikakiti erekari oereka aĩto paniãtakiti atakanapini, atão inakaranoka akamini, Teoso nireẽkiti akamini ĩkorapokoriti aũuakasaaki. ¹³Ĩkorapokoriti aũuakasaaki, aiãtapari poxokonitxi õti Apiananiri aTeosone apokini õti. Iuasaaki Xesosi Kristo, amaerekani makatxakakari, motika atemoni. ¹⁴Iuaka sikaua Teosomoni ate ĩkapani ipĩkasaaki. Iuasaaki iĩkitxitari Teoso, ininiã Teoso makatxakaua ikinika maerekanitxi sauaki. Ikara atoko ininiã, ikamaerekataua ate. Ininiã itxĩkitakaua inakitiakori aniniua, ininiã anirekari erekari akamini.

¹⁵Auĩtetxi pininiua atoko pipaniãtariko kãkiti kĩpitiniri ikara nisãpiretakiti. Põtãkikana nisãkire makĩpitakani. Kona pauiritapiri kãkiti sãpiretiniri pisãkire atão minakati inini.

Teoso Nireẽkiti Kamiko

3 ¹Txito, ia atoko poerekariko kãkiti: “Hĩpaxitariko ĩkorapokoriti auĩtetxiakori paniãtakiti, poiãori auĩtetxiakori paniãtakiti apaka. Iposope hĩtxako ikinika erekari hĩkamini. ²Kona himisãkirepiretapiri apanakini. !Hineenamauatape. Merepanika hĩxinikariko apanakini, eereka hĩteka hĩxinika. Hõerekariko kãkiti, hĩxinireẽ hinirekiniri erekari hĩkamini ikinimanemoni.” Ikara atoko poerekana.

³Teoso aimarotini apisapanika miĩkiteni atxaua. Kona akĩpitari kãkiti sãkire, Teoso sãkire apaka. Iuasaaki ate misirienetaãka. Iuasaaki akamari aĩto nireẽkitinoka. Ikini sereti maerekati akama apoxokoniuatini ĩkapani. Iuasaaki ikiniõtika axinikari maerekati akamini. !Apakata akamakiti. Kaxikororini atxaua iuasaaki. Ate omanataãka. Apaka ate omanatari apanakini iuasaaki.

⁴Ininiã eereka Teoso tiraõki, amaerekani makatxakakari tiraõki, iua amonĩkare, apoka atemoni. ⁵Ateka parĩka erekari !imaktxakari amaerekani. Iua amonĩkarenokara makatxakari amaerekani. Iuasaaki na atão akama, iuaritika imaktxakari amaerekani, kotxi

itiretaua. Iuasaaki iua arokari aãkixinire. Itxĩkitakaua ate aponaniini iuaĩkana. Iuasaaki Erekarı Matamatakoti kamarı ikinika amaneri axinireẽ. ⁶Teoso iokanatarı Erekarı Matamatakoti kaposotiireri atemoni, kotxi Xesosi Kristo, amaerekani makatxakakari, ipina ate ĩkapani. ⁷Iua sikari ikinipoko erekari atemoni, ininiã ikamaerekataua. Ininiã itxĩkitakaua Teoso anaakori aniniua, ininiã aãpakapariko ipotetakiti ate ĩkapani. Iua atoko ininiã, aiãtapari ãtipirika Teosokata aãuini ĩkapani. ⁸Atãopitikara ia nisãpiretakiti.

Ininiã ninirekarı ãtipirika pisãpiretiniri ikinika nisãpiretakiti Teoso sãkire auĩãkanimoni. Ikara atoko Teoso auĩãkani itaparaxinireritika kamariko erekari apanakini ĩkapani. Kona maxikatiĩka ikamarina erekari. Teoso atão ĩkitxitariko kãkiti. Ikara atoko kãkiti kaminiã, ininiã erekari ikinimane ĩkapani.

⁹Kona pimaãkatapiri miĩkiteti sãkire. !Hĩtaparakienatakapeua kitxakapirĩkarini uãka xika. Kona himaãkatapenako kãkiti kiomãtxiakori oerekakiti xika tsoatakani. Ikara sãkiretxiti !itxĩkitakai erekari hininiua. !Itxa ikara sãkiretxiti.

¹⁰Kãkiti oerekiniãri atão minakati Teoso manirekakiniti, põtãkikari iua ipikata. Iposo atoko !pimaãkataikari. ¹¹Ikara atoko inakari atão ĩkrite !auari. Maerekati ikama. Ikamakiti oerekari apanakini, maerekati kamakari ininiua. Iuaka imaerekani xika imisiritiko apokako.

Paoro Sãpiretakiti Mapotõkire

¹²Niokanatarı Atemasi inakori, atxiĩti Txĩkiko inakori apaka pitemoni. Ninoa apokasaaki, paiamata pisini ĩkapani, katimari notamoni Nikõpori sitatxitiã hãpokini ĩkapani. Ninirekarı ia mitaãti nikaikotini iuaã.

¹³Pimoianatarı Sena inakori, Aporo inakori pakini. Auĩtetxiakori paniãtakiti imarotakarı iua Sena. Pimoianatanako ninoa aiamatini. Iamonitakitina pisikanako. ¹⁴Aĩtariakori Xesosi sãkire auĩãkani apaiãõkariko erekari ikaminina, kãkiti minakati mauakiniti imoianatinina ĩkapani. Makamaretika hinini !apakata.

¹⁵Notakata auakani xinikapikai pite. Pisãpiretanako ate tirketakani ereẽ Xesosi sãkire auĩãkani nixinikamanapitana ninoa.

Ikinika erekari Teoso sikai hĩte hĩkinika. Ikara atoko niõkatsopata pitemoni. Ameẽ.